

Lo vin novèl

Dedicat als vinheirons de mon país

Per plan cantar lo vin, lo cal saupre beure
Anem ! Batista, meis, que mon gobèl es liure !
Ai bon engolador quand lo vinet es bon
E lo senti passar fin coma de velós.
Torna meisse, Batista e zop ! se me vòls creire
Après poirem brindar sens far tòrt a degus.

Totes al còp, cantèm, disciples de Bacús
L'imne qu'es a l'onor del sang clar de la tèrra
Que fa rire lo paure al mièg de sa misèra,
Lo vin, nòstre bon vin qu'es mai qu'una licor,
Aquel jus de Nòe que congrelha l'amor
E dònna de colors a nòstras gaias minas,
El que recambalís los que tòmban d'esquinas.

Glòria a nòstres primcols, vins blancs, roges, clarets
Que fan truca-trucar mai d'un per las parets,
Als vins que fan saltar los taps de las botilhas,
Que fan cantar, que fan dançar garçons e filhas
Donent calor al cur e gaitat a l'esprit,
Glòria al vin capitós rei de cada convit
Aquel vin qu'a rajat dels rims de bona soca !

Lo raspet qu'engolam nos embauma la boca
S'i a pas prosses barrals, saurem ont lo cabir.
Nòstre vin lo fasèm, e buvèm nòstre vin.
Ò sang del terrador que petejas a grumas
Dins la tassa d'argent, tu que dins mon nas fumas
Pòrtas de pèrlas d'òr e d'ulhons de diamants
A vos far regassar los vinheirons païsans.

Bèdres trabalhadors, qu'avètz sovent la guinha
S'aimatz lo vin, sabètz aimar tanben la vinha.
Per festar Sent Vincens, ò fraires del paissèl,
Levatz un còp de mai lo coide deval cèl
Coma s'atal voliatz trincar ambe los anjas
O lor faire sentir qu'a de vigors estranjas,
Nòstre vin que de còps se sap far cambiar en Dieus
Es ben tan coquinòt qu'esparnha pas los seus.

Ausissètz sos gloglós, l'oire es plen, viva l'oire !
Amics, asolhatz vos lo dedins per, puèi, poire
Trabalhar coma cal las vinhas sens retard.
Baste gardar'n bèl briu lo gost d'aquel nectar !
Es el que nos sosten. Qu'un barral se desliure,
Fraires de Sent Vincens, buvètz e fasètz beure !

Joseph Vaylet
1927